

Samarqandda Birinchi Prezident xotirasiga bagʻishlangan tadbirlar boʻlib oʻtdi

31/01/2023 - 19:27



O'zbekiston Respublikasining Birinchi Prezidenti Islom Karimov tavallud kuni munosabati bilan yurtimizda ma'naviy-ma'rifiy tadbirlar, xotira kechalari o'tkazilyapti. Islom Karimov tug'ilib o'sgan va ayni paytda mangu orom topgan Samarqand shahrida ham xalqimizning ardoqli farzandi yod etilmoqda. Bugun erta tongda Samarqand viloyati hokimi Erkinjon Turdimov boshchiligidagi viloyat faollari shahardagi Islom Karimov maqbara-majmuasini ziyorat qildi. Qur'on tilovat qilindi. Shundan so'ng Registon maydoni yaqinida O'zbekiston Respublikasining Birinchi Prezidenti xotirasiga o'rnatilgan haykal poyiga viloyat va shahar hokimlari, huquqni muhofaza qiluvchi organlar, davlat va jamoat tashkilotlari tomonidan gullar qo'yildi. Shuningdek, viloyatdagi ta'lim dargohlari va boshqa muassasalarda O'zbekiston Respublikasi Birinchi Prezidentining hayoti va faoliyatiga bag'ishlangan davra suhbatlari, ilmiy-amaliy anjumanlar o'tkazilmoqda. Jumladan, Samarqand shahrida "Islom Karimov fondi" tashabbusi bilan tashkil etilgan marosimda viloyat va shahar hokimligi vakillari, nuroniylar, faollar ishtirok etdi. Tadbir avvalida ishtirokchilar Islom Karimov tug'ilib, o'sgan xonadonda bo'ldilar. Tadbirda Islom Karimovning hayoti, ilm-fan, madaniyat va ma'naviyatni rivojlantirish borasidagi ishlari eslandi.
